

## Štanzëlao e u ciuccë capë tuostë

Quann'éva 'uaglionë, quascë tuttë lë cuntarinë chë tènëanë lë tèrrë pë Collë dëll'Urzë, pë Cacciapëscë, pë Sangiuanniëllë e p'abbascë u Murtariëllë, mënivënë a vénë vërdurë e frutta pë lë Cappuccinë e pë lë Casë Popolarë, arrëtë a la chiésia. Allóra 'stë ddu'quartierë dë Cambuàscë évënë chinë chinë 'é 'uagliunë, ca lë famiglië, a chillë tiémpë, facëanë nu sacchë 'é figlië. Sa' cumm'è... Prima dë la guerra Mussëllinë révë u premië!...

Nu', 'uagliunë, štavamë sèmpë mmiez'a la vija a paccià. Lë cuntarinë mënianë kë lë ciuccë chë chiamavënë " vëtturë ", cummë nu' chiamamë oggë lë machënë.

Scignëanë lë "piunzë" chinë 'e rròbba e lassavënë lë ciuccë attaccatë vicinë a lë murë o a lë canàrë dë lë palazzinë.

Spissë, nu' 'uagliunë pigliavamë 'štë ciuccë e scurrazzavamë pë lë vijë du quartierë.

Cë štëa nu tizië chë pë 'nzë fa frëcà u ciuccë, ru attaccavë a Via Piavë, vicinë a la casa 'é Rubbënëlla, faccëfruntë a zi' Giorgë e po' zë në jva a fa lë fattë suo'.

'Št'omë u chiamavënë Štanzëlāë.

Na matinë Štanzëlāë, roppë fattë lë fattë suo', sciugliëttë u ciuccë e zë mëtëtëtë a cavallë pë zë në turnà a la massaria; sprunattë la bèštia, ma chëlla 'nzë smuvéva. Pruvattë a tērarlë lë caucë rénta la panza, alluccannë " Ah! ", ma la bèštia purë kë lë caucë e capëzzatë, nnë vulëa sapé' 'é cammënà.

Allóra Štanzëlāë zë 'ncazzattë pëggë 'è nu riāulë. Scignëttë da u ciuccë, l' acchiappattë la capë mmiëzë a lë manë e dicëttë: " Tu nnë vuo' cammënà e mò tē faccë véré' i' " e tē l'azzëccattë nu muccëchë 'ncopp' u nasë.

U povërë ciuccë mmënatë n'allucchë fortë p'u dulórë e 'ntantë lë scëtë nu sacchë 'é sanghë, ca 'nzë fërmavë pë quantë cë në scija. Allóra Štanzëlāë zë facëtë rà nu štraccë da Rubbënëlla, u bagnattë r'acqua e cë ru mëtëtëtë 'ncoppë u nasë finë a quannë u sanghë 'nzë fërmattë.

A la finë zë mëtëtëtë a cavallë a u ciuccë e, sulë ca sbattëtë nu pochë la capézza, u ciuccë 'ncumënzattë a truttà cummë a nu pullëtriëllë.

(Cërtë ca è proipa véré ca quannë unë 'nt'ubbërisçë, cë vo' la mazza!)

'Štu fattë a chille tiémpë 'nfacëtë nutizia, ma a tiémpë d'oggë na cósà 'é chëssa avarria fattë u girë dë tuttë lë giurnalë d'u munnë!

La vëretà è ca allórë l'uómmënë évënë cchiù bèštië dë lë ciuccë, forzë pëcchë zë paccariavë!

